



大岳太和山誌卷之三

列聖

勅諭

勅創建宮觀

永樂十年七月十一日

欽降示諭官民工役

黃榜

皇帝諭官員軍民夫匠人等

武當天下名山是

北極真武玄天上帝修真得道顯化去處歷代
都有宮觀元末被亂兵焚盡至我朝

真武闡揚靈化陰佑國家福被生民十分顯應
我自奉

天靖難之初

神明顯助威靈感應至多言說不盡那時節已
發誠心要就北京建立宮觀因爲內難未
平未嘗滿得我心願及即位之初思想武
當正是

真武顯化去處即欲興工創造緣軍民方得休
息是以延緩到今而今起倩此軍民去那
裏創建宮觀報答

神惠上資薦揚

皇考

皇妣下爲天下生靈祈福用工夫不多至容易
不難特命隆平侯張信駙馬都尉沐昕等
把總提調管工官員人等務在撫卹軍民
夫匠用工之時要愛惜他氣力體念他的

勤勞關與糧食休着他受饑寒有病着官醫每用心調治都不許生事擾害違了的都拿將來重罪不饒軍民夫匠人等都要聽約束不許奸懶若是肯齊心出氣力呵神明也護佑工程也易得完成這件事不是因人說了纔興工也不因人說便住了工若自己從來無誠心呵雖有人勸着片瓦工夫也不去做若從來有誠心要做呵一年豎一根棟起一條梁逐些兒積累也務要

做了恁官員軍民人等好生遵守着我的言語勤謹用工不許怠惰早完成了回家
休息故諭

永樂十一年八月二十五日

勅正一嗣真人張宇清武當天下名山

真武成道靈應感化之地元末宮觀悉燬于兵
遂使羽人逸士修鍊學道者無所依仰朕
積誠于中命創建宮觀上以資薦

皇考

皇妣在天之靈下以爲天下生靈祈福俾雨暘
時若災沴不生年穀豐登家給人足今宮
觀已告成神明屢顯休應圓光煜燁五色
燦爛神像昭彰見于光內觀者數千萬人
咸加嘆異已

賜名曰

玄天玉虛宮

太玄紫霄宮

興聖五龍宮

大聖南巖宮然此名山勝境必得高人羽士以
住持看守大聖南巖宮已嘗命正一孫碧
雲爲住持外其三處爾即選有道行者各
二人爲住持別選至誠敬謹道士每處各
五十名看守如一時選揀不出隨爾所選
得若干人就分派四處看守精進修行興
隆道教故諭

永樂十七年四月二十九日

勅隆平侯張信駙馬都尉沐昕淨樂國之東有

紫雲亭乃

玄帝降生之福地勅至即於舊址仍創紫雲亭務要弘壯堅固以稱瞻仰其太子巖及太子坡二處各要童身真像爾即照依長短闊狹備細畫圖進來故勅

勅重修宮觀

嘉靖三十一年二月十九日傳奉

聖旨

朕

成祖大建

玄帝太和山福境安鎮華夷厥靈赫奕計今百數十年必有弗堪者朕今命官奉修便行與湖廣公撫按官督同該道官詣山勘視應合修理處所估計工費限四十日以裏回奏工部知道

嘉靖三十一年 月 日

欽差巡撫都御史屠大山等題嘉靖三十一年三月初九日酉時准工部差千戶吳堂齎

大正和志
卷三
五二
咨到內開本年二月十九日卯時該司
禮監太監王利於

迎和門傳奉

聖旨朕

成祖大建

玄帝太和山福境安鎮華夷顯靈赫奕計今百
數十年必有弗堪者朕今命官奉修便行
與湖廣撫按官督同該道官詣山勘視應
合修理處所估計工費限四十日以裏回

奏工部知道欽此又准本部咨該本部題
前事奉

聖旨是不許違悞欽此欽遵臣會同巡按湖廣
監察御史胡宗憲議照太和山實

玄帝棲真之所安鎮華夷其宮觀祠宇自我
成祖文皇帝初建以來百數十年歲月既久不
無損漏惟

金殿一座在太和山之絕頂者冶鑄堅完粧飾
精巧未有損壞自太和山宮以下類有弗

堪誠如

聖諭委宜及時修理以先前列巨等悉心逐一
勘視罔敢遺漏理合具

奏伏乞

勅下該部再加查議

上請定奪等因奉

聖旨既勘計明白便修理着原任侍郎陸杰提
督工程寫勅與他即赴工所工部知道欽
此

嘉靖三十一年六月 日

勅原任工部右侍郎陸杰

朕惟我

成祖大建

玄帝太和山福境安鎮華夷顯靈赫奕計今百
數十餘年宮觀祠宇等處不無損壞若不
及時修理慮恐日就傾頽其何以棲真妥
神祝釐保國已令湖廣撫按官勘視回奏茲據
各官備將應合修理處所并估計工費等

項前來今特命爾前去提督工程爾宜查
照該部題准事理會同撫按官將應修宮
觀祠宇處所會勘明白即便興工修理合
用物料於見頒去官銀及有司動支處辦
聽用其一切應行事務爾等須酌議停當
隨宜增損事完通將辦過工程用過物料
銀兩數目造冊奏繳朝廷以爾素有才望
特茲簡任爾宜敬慎從事體朕崇奉
玄聖至意不可纖毫怠忽務期工作堅固壯實

用副我

皇祖功烈萬萬年同其久遠欽哉故勅

欽降像器

成化九年七月二十九日

欽降聖像共三十尊供器三副全于太和玉虛
宮安奉

成化十二年正月十五日

欽降銅爵盞一百四十七箇真武經五百本分
布玉虛等七宮

成化十二年十一月

欽降龍牌十三座于玉虛等宮安奉

成化十四年六月二十九日

欽降聖像共十尊供器全

成化十九年九月初八日

欽降聖像一堂于五龍宮安奉供器全

成化二十二年九月初一日

欽降聖像三千四百六十軸道經七千卷

弘治七年八月初九日

欽降聖像一十九尊供器全紵絲幡三十對

弘治十年四月二十七日

欽施銀七百兩各色幡三十一對

弘治十二年十月初八日

欽施銀五千六百兩各色幡五十四對

弘治十四年七月二十五日

欽降聖像五尊供器全

弘治十五年十二月二十五日

欽安聖像銀三千兩

弘治十八年十一月十一日

欽降聖像一堂于太和山金殿安奉

正德二年八月初三日

欽降聖像一堂于太和山安奉

嘉靖五年二月十六日

欽降聖像一堂于淨樂宮安奉供器全

嘉靖三十二年十一月二十四日

欽降幡二十八對 頂帳四十四副全

蠲免征差

永樂十五年二月十九日隆平侯張信早
於

奉天門奏大岳太和山附近湖廣襄陽府均
州今無將那本州該管軍民人戶與免科
差分派輪流前去玄天玉虛宮等處守護
山場灑掃宮觀奉

聖旨是稅糧依舊着辦其餘科差都免了欽此

洪熙元年正月十三日

勅湖廣都指揮使司

朕

皇考太宗文皇帝臨御之日創建大岳太和山
宮觀上以資薦

皇祖考

皇祖妣在天之靈下為四海蒼生祈迓福祉工
既告完已勅湖廣布政司右叅議諸葛平
常川用心巡視遇有損壞隨即修整

朕今祇承鴻業篤念

皇考先志實欲虔奉祀事於悠久以冀利澤於

無窮勅至節免爾均州一千戶所軍餘雜
泛差役盡數存留在州聽叅議諸葛平及
千戶朱彛提督但遇宮觀有損壞滲漏之
處隨即修理溝渠路道有淤塞不通之處
隨即整治務使宮觀永遠完美溝渠路道
永遠通利庶稱

朕心茲特以勅諭爾等其敬承之毋怠故勅

宣德元年正月十七日

勅蠲免子粒同前

成化五年五月二十四日

勅蠲免征差同前

弘治八年九月

勅蠲免子粒同前

佃戶附

永樂十四年九月初三日該隆平侯張信

傳奉

聖旨武當山各宮觀別無田糧供贍着戶部差
官去踏勘附近閑田着法司撥徙流犯人

五百名去那裏做佃戶專一耕種供贍若
是本山宮觀邊廂有百姓每的田地就見
數撥與佃戶每種另尋田土撥與百姓欽
此

景泰五年二月二十四日湖廣布政使司

為民情等事奉

聖旨同前

勅護山場

成化十二年欽奉

勅諭官員軍民諸色人等

朕惟大岳太和山與聖五龍宮自然庵乃羽士棲真之所上爲國家祝釐下爲生民祈福者也其地東至青羊澗西至行宮南至桃源澗北至明真庵爲庵中永業恐年久被人侵毀特賜護持凡官員軍民諸色人等毋得欺凌侵占以阻其教敢有不遵朕命者論之以法其本庵道士張復心所居之處賜名長生巖故諭

成化十七年十月二十四日欽奉

勅諭官員軍民諸色人等

朕惟大岳太和山乃

玄帝顯靈之所天下名山也其形勝蟠踞八百餘里而中峯巖灘澗宮觀河橋竝峙橫跨焉蓋以神妙莫測冲用潛通上以佑助國家下以錫福生民故歷代迄今崇奉之有加往者石板灘迎恩橋累被山水暴發衝損人以爲患提督太監韋貴自備資財乃

於橋東創建觀宇奉神鎮奠之數年來果
獲顯應前患用弭人賴以安朕嘉之已賜
額曰迎恩蓋昭神貺也至是貴又奏乞照
本山宮觀例凡有滲漏損壞一體修理及
令道士計崇虛於內領衆焚修朕特俞允
仍降勅護持之繼今以往一應官員軍民
諸色人等毋得侵毀褻瀆生事擾害敢有
阻壞其教不遵朕命者國有常憲故諭
以後護守山場

勅 凡五道俱類前勅故不悉錄

勅 存留香錢

嘉靖十七年三月 日禮部爲遵

勅諭請

明旨存香錢免借貸以便祀神修理預備凶荒
賑濟事奉

世宗肅皇帝聖旨是這香錢着存留本山備用
不許有司借貸禮部知道欽此

嘉靖二十一年三月 日

欽差提督大岳太和山內官監左少監王佐題
前事

嘉靖二十四年十二月初七日日本官覆題
前事

嘉靖三十一年正月十一日本官覆題前
事俱奉

世宗肅皇帝聖旨這香錢着照舊例行該衙門
知道欽此欽遵

隆慶二年五月初六日

欽差提督大岳太和山內官監太監柳朝謹
題為懇乞

天恩復舊制隆

聖典以正紀綱以便遵

勅焚修事本年六月初九日奉

聖旨武當山

玄聖之處是我

祖宗佑國保民之際如何這等紊亂都着照舊
行禮部知道欽此欽遵

隆慶三年三月十二日本官覆題前事本年四月初六日奉

聖旨這香錢照舊存留本山修理等項用戶部知道欽此欽遵

勅提督藩臣

舊誌藩臣列於內臣之後今查得勅藩臣在永樂二十二年勅內臣在正統十年故改列於前

永樂二十二年二月十九日

勅湖廣布政司右叅議諸葛平

朕創建大岳太和山宮觀上資薦揚

皇考

皇妣二聖在天之靈下爲四海蒼生祈迓福祉以敷利澤於無窮然工作浩繁皆天下軍民辛勤勞苦久而後成今工已告完特勅爾常川巡視遇宮觀有滲漏處隨即修理溝渠道路

有淤塞處即便整治合用人工就於均州千
戶所官軍撥用務使宮觀完美溝渠道路通
利庶不隳廢前工以虔祀事於悠久如此則
神明昭鑒使爾享無窮之福若玩法偷安致宮觀
損濕溝渠淤塞則罰及爾身將不可悔故勅

宣德十年三月十六日

勅禮部員外吳禮及均州千戶所今命尚膳監
左監丞陳埜前來與爾吳禮一同提督均
州千戶所軍餘常川巡視大岳太和山宮

觀遇有滲漏損壞之處隨即修理溝渠路
道有淤塞不通之處隨即整治俾宮觀永
遠堅固完美及本所軍餘雜泛差役及屯
田子粒照舊盡行蠲免襄陽衛原撥官軍
四百二員名俱放回操備故諭

正統元年十一月初七日

勅行在禮部郎中邵正昔我

皇曾祖太宗文皇帝創建大岳太和山宮觀虔
奉祀事以冀利澤於悠久我

皇祖仁宗昭皇帝

皇考宣宗章皇帝臨御之日篤念

先志特優免均州一千戶所軍餘雜泛差役并
勅湖廣都司布政司將本所屯田子粒盡
行除免凡遇宮觀有滲漏損壞之處隨即
整治朕今嗣承大位一遵

祖宗之心虔奉祀事弗敢少怠茲特命爾前去
與大岳太和山玄天玉虛宮提點及均州
千戶所千戶一同提督軍餘修理務在恭

勤趨事使宮觀永遠完美溝渠路道永遠
通利庶稱朕心如或怠慢及私役軍餘則
罰及爾等不可悔矣故勅

正統七年二月十八日參議李侗

景泰元年九月二十七日參議樊敷

景泰五年九月十二日參議黃順

以上三員俱同正統元年郎中邵正

勅

天順四年三月十九日

勅大岳太和山提調官右叅議李孟芳

朕念大岳太和山宮觀是

祖宗創建棲神之所今命爾同內官奉御唐廣
提督均州千戶所官軍專一照管灑掃凡
遇宮觀滲漏損壞者隨即修理如新及橋
梁坍塌溝渠淤塞道路毀阻隨即補砌疏
通整理堅完務在廟貌森嚴道衆潔淨虔
奉祀事供養香火以祈福佑於悠久庶不
負朕敬神之意毋或不正其身縱欲圖利

私後軍餘科擾下人及怠惰廢弛肆無忌
憚自取罪愆朕不爾宥爾其慎之故勅

成化八年八月初八日

勅大岳太和山提調官湖廣布政司右叅議王
豫

朕念大岳太和山宮觀是

祖宗創建棲神之所今仍命爾與左監丞韋貴
率同玉虛宮提點均州千戶所千戶提督
軍餘專一照管灑掃凡遇宮觀滲漏損壞

者隨即修治如新及橋梁坍塌溝渠淤塞
道路頽毀者隨即補砌疏通整理堅完務
在廟貌森嚴道衆潔淨虔奉祀事供養香
火以祈福佑於悠久庶不負朕敬神之意
毋或不正其身縱欲圖利無事之日仍提
督正伍官軍操守城池防禦盜賊或本處
并隣近府縣草寇生發本所官軍相應調
用聽鎮守總兵等官與爾等計議斟酌施
行其餘一應雜泛征差運糧屯田等項一

體優免爾宜恪遵朕命恭勤趨事不許怠
忽廢弛及在彼生事私役科剋害下人
自取罪愆爾其慎之慎之故勅

成化十一年三月十六日叅議梅倫

成化十五年十一月十六日叅議韓文

成化十六年十一月十六日叅議李謙

成化二十三年三月二十八日叅議龔膺

弘治三年二月二十日叅議馬銓

弘治五年 月 日叅議張較

以上六員俱同成化八年參議王孫

勅

弘治七年四月十九日

勅大岳太和山提調官并分守湖廣下荆南道
兼管撫民布政司右叅議陳睿

朕惟大岳太和山宮觀是

祖宗創建棲神之所今命爾與太監潘記率同
玉虛宮提點均州千戶所千戶提督軍餘
專一照管灑掃凡遇宮觀滲漏損壞者隨

即修治如新及橋梁坍塌淤塞道路頽毀
者隨即補砌疏通整理堅完務在廟貌森
嚴道衆潔淨虔奉祀事供養香火以祈福
佑於悠久庶不負朕敬神之意無事之日
爾仍與記提督正伍官軍操守城池防禦
盜賊或本處并隣近府縣草寇生發本所
官軍相應調用聽鎮守總兵并撫治等官
與爾等計議斟酌施行其餘一應雜泛征
差并運糧屯田等項一體優免今又加爾

以下荆南道分守撫民之任爾不妨本職
往來所屬巡視地方將一應附籍安插并
陸續逃移人民必須以時戒飭嚴加禁約
不許非爲敢有擾害居民者爾即量情懲
治應拿問者依律拿問情輕者照例發落
罪重者即將正犯枷釘連妻小差人奏解
來京定發克軍殺傷人者處以極刑若有
貪暴官吏豪橫軍民人等生事欺害逃民
者亦一體依律拿問究治及凡有可以除

奸革弊使民弭盜之方聽爾計議審處或
事重難以區畫具奏處置遇有妖人聚衆
及草寇生發即調所在官軍相機撲捕無
致滋蔓爾爲朝廷簡用必須嚴公勤慎敬
以奉神仁以撫下務在事妥民安斯稱任
使汝或因循苟且悞事慢神殃民必罪不
宥汝其欽承之毋怠故勅

弘治十三年十一月二十九日叅議華山
正德三年九月二十八日叅議邵崇

正德七年十一月三十日參議白金

正德八年六月初六日參議張瀚

正德十二年閏十二月初四日參議張良弼

嘉靖二年 月 日參議陸杰

嘉靖五年 月 日參議盧煦

嘉靖八年 月 日參議張鯤

嘉靖十年 月 日參議崔桐

嘉靖十一年 月 日參議劉彭年

嘉靖十二年 月 日參議鄭灝

嘉靖十三年 月 日參議陳良謨

嘉靖十五年 月 日參議方升

嘉靖十七年 月 日參議吳檄

嘉靖二十年 月 日參議段續

嘉靖二十一年 月 日參議鍾雲瑞

嘉靖二十二年 月 日參議秦鏊

嘉靖二十三年 月 日參議王鎬

嘉靖二十五年 月 日參議張緒

嘉靖二十七年 月 日參議吳子孝

嘉靖二十九年 月 日 參議雷賀

嘉靖三十二年 月 日 參議王繼洛

嘉靖三十五年 月 日 參議成子學

嘉靖三十八年 月 日 參議劉子興

嘉靖四十年 月 日 參議劉應箕

嘉靖四十二年 月 日 參議楊儲

嘉靖四十三年 月 日 參議王楷

隆慶元年 月 日 參議常三省

隆慶二年 月 日 參議王應顯

隆慶五年 月 日 參議李存文

以上三十員俱同弘治七年參議陳睿

勅

隆慶六年五月二十四日

勅湖廣布政司右參議李貴和

朕惟大岳太和山宮觀是

祖宗創建樓神之所今命爾與差去內臣率同

玉虛宮提點均州千戶所千戶提督軍餘

專一照管灑掃凡遇宮觀滲漏損壞隨即

修治橋梁坍塌淤塞道路頽毀隨即補砌
疏通整理堅完務在廟貌森嚴道衆潔淨
虔奉祀事供奉香火以祈福祐於悠久本
山香錢會同內臣選委員校收支無事之
日爾提督正伍官軍護守城池防禦盜賊
本處并隣近府縣草寇生發本所官軍聽
總兵等官與爾計議調用一應雜泛征差
并運糧屯田等項查照舊例優免爾仍不
妨本職分守荆南道巡視所屬地方撫治

一應附籍安插并陸續逃移人民如有擾
害居民者爾即量情懲治應拿問者依律
拿問情輕者照例發落罪重者即將正犯
枷釘連妻小差人奏解永京定發充軍殺
傷人者處以極刑若有貪暴官吏豪橫軍
民人等生事欺害逃民者亦依律拿問究
治凡有除奸革弊便民弭盜之方聽爾計
議審處事體重大者具實奏聞處置遇有
妖人聚衆為亂即便調官軍民兵相機撲

奏
卷三
三
戒毋致滋蔓爾受茲任使須廉勤公慎敬
以奉神仁以撫下務在事安民安斯為稱
職如或因循誤事慢神殃民必罪不宥爾
其欽承毋忽故

勅

請給關防疏

欽差提督軍務兼撫治鄖陽等處地方都察院

右僉都御史臣楊 謹

題為

請給關防以重責任事據湖廣按察司分巡下

荆南道副使葉朝陽呈奉臣紙牌為照

舊制各分守官駐劄省城錢穀出納皆由總司

會計戎務刑名悉屬分巡官專理以故政

務稀簡未給關防今照分守下荆南道見

駐均州稽查錢糧問理刑名督捕盜賊編
審差徭與分巡道畫地分轄責任相同但
一應呈遞公文俱係空白扼弊防奸憑何
爲據及查撫屬陝西分守關南道分守商
洛道湖廣分守上荆南道各有關防該道
關防似當一體

請給備行本道會同分守道從長計議要見該
道職務較昔是否繁重合用關防應否比
例

請給明白呈詳以憑具

題等因依奉行准分守下荆南道右叅政陳
惟直手本移稱本道設立之初職任最簡
印記可無自弘治柒年內奉

勅兼管撫民分守鄖襄地方事務增劇各屬錢
糧查催支放及審編差徭緝捕盜賊人命
重獄竝屬審讞文移呈上發下向無印記
鈐蓋本職駐劄地方去鄖陽百餘里去省
城千餘里郵遞奸偽寧無可虞方欲比例

呈詳蒙行查議深爲便益等因准此又該
本道看得分守下荆南道初設之時政務
尚簡于後兼管撫民錢穀刑名皆屬職掌
白頭文移易生奸弊合無比照陝西分守
關南道分守商洛道湖廣分守上荆南道
事例

請給關防等因呈詳到臣據此案照先爲前事
已經牌行該道會同查議去後今據前因
該臣看得湖廣分守下荆南道與分巡道

各駐一方不但刑名錢穀盜賊差徭總理
查覈當用關防鈐記即今該州捌官官道
數踰萬人每歲香客從四方絡繹來者豈
止數萬深山窮谷之間彈壓兇頑保護良
善較之分巡官責任似尤繁重若使文檄
往返無印鈐蓋委於政體未便所據前項
關防既經分巡副使葉朝陽分守叅政陳
惟直會議明白又該臣叅詳無異相應題
請如蒙

勅下該部再加查議果臣言不謬將分守下荆南道比照陝西分守關南等道事例鑄給關防壹顆令其收掌庶事體既隆展布更易防閑有據奸蠹可釐緣係請給關防以重責任事理未敢擅便為此具本專差承差王良親齎謹題請

旨

萬曆捌年肆月

日奉

聖旨禮部知道

禮部 題為請給關防以重責任事儀制
清吏司案呈奉本部送禮科抄出云云欽
此欽遵抄出到部送司案呈到部看得

欽差提督軍務兼撫治鄖陽等處地方都察院

右僉都御史楊

題稱分守下荆南道

見駐均州稽查錢糧問理刑名督捕盜賊
編審差徭一應呈遞公文俱係空白扼弊
防奸憑何為據乞要比照陝西分守關南
等道

請給關防一節既經彼處巡撫官具題前來相

應題

請鑄給所有關防字樣伏乞

欽定恭候

命下本部劄付鑄印局鑄完給發原差人役領

回該衙門交收用使等因萬曆八年五月

初二日具題初四日奉

聖旨與做分守下荆南道關防欽此

